

Kerweborsch



**vum
Hessische
Hof**

Worfelle

1987

Kerwespruch 1987

Die Vejel peife`s iwverall,
fünf Johr Kerweborsch beim "Klinke Kall",
drum grieß ich Eich vun nah un fern,
uff Worfeller Kerb recht gern -
Seit longem schunn dunn mer uns queele,
unn dunn die Taache bis zur Kerb nur zähle,
es gonze Ort des war nerwees,
in jedem Haus do war Gedees,
die Modder macht die Wutz,
werd`se gestehrt beim Kerwebutz,
un in alle Worfeller Kische,
duhts noch Quetschekuche rische,
aa unser Oma, wos e Fraad,
geht uff die Kerb mi`m neije Klaad,
un unsern Opa ess uff Zack,
geht uff die Balz mi`m Hochzettsfrack,
moi Modder un ehrn Alde,
dunn gonz verliebt im Arm sich halte,
aa de Kerwebutz es obgeschlosse,
drum kenne mer jetz aa Domp oblosse,
un feiern unser Kerb gonz uhbeschwert,
so wie`s fer`n Worfeller sich gehert,
un dodezu loade herzlich mer Eich oi,
mer stosse oh mit Kerwewoi,
trinke aus un sojn gonz froh,
weil`s haaßt : " DIE WORFELLER KERB ESS DO !! "



Im letzte Johr, ihr werd`s all noch wisse,
honn mer gonz schee schwitze misse,
weil unsern Kerweboam, des es bekonnt,
mol wirrer de Greeste war im Gerer Lond.
Der hat 25 Meter, vum Scheitel bis zur Sohle,
war des e Ärwet, den aus`em Wald zu hole,
dunn gab`s im Wald fer uns Maleer,
den Boam umzuleije war ziemlich schwer,
denn ringserum, des war`s Problem,
do stande aa en haufe Beem,
do hat jo unsern dicke Watz,
zum Falle net veel Platz,
desweije, do werst`e glatt verrickt,
hot`s em beim Falle die Kron`verknickt. --

Des es uns glei dreimol so bassiert,
erst beim viertemol hot`s funktioniert,
doch der Vierte hat iwver 20 Meter Länge,
un im Wald do herrscht bekonntlich Enge
trotzdem mer`n longsom rausbucksiert,
honn mer den scheene Kerweboam lädiert,

korz unner soine Spitz war`er geknickt,
do honn mer`n schnell vor Ort geflickt,
sodaß`er fähisch war fern weitere Transport.
Donn soin mer mit dem Uhflohtsding ins Ort,
dort honn mer`n geschient, ihr hobt`s jo **all** geseije,
do es sogar de Hackethal en Amateur degeije,
denn der Boam der hot gestanne wie de schiefe Torm,
bei Sunneschoi, bei Reije un bei Storm. --


Doch Oans des es seitdem fer uns Gewiß,
daß desjohr unser Beemche kerzer is,
doch es`er net, wie oanern Leit se honn,
so korz, daß mer`n in`en Blumedippe stelle konn,
er raacht aa desjohr wirrer iwver jedes Haus,
mer sieht`en fast vun Fronkfort aus,
un die Musik speelt fer alle Leit,
" So ein Tag, so wunnerschee wie heit ".

Genuch jetz vun dem Mißgeschick,
moiner Lewwer haach ich glei ins Gnick,
die gibt koa Ruh` des staawisch Dier,
sie riff als noch em kühle Bier,
doch om Umzuuch werd koa Bier getrunke,
drum hob ich schunn em Vadder Bär gewunke,
daß`er mer, wie konn`s oanerst soi,
e Gläsje gibt mit Kerwewoi,
so stoße mer oh mit alle Leit,
" Ein Prosit der Gemütlichkeit ! "

In unserm nächste Vers do werd verzehlt,
wie sich Owends Oaner obgequeelt,
de Herbert nämlich, des es e alt Supp`,
hockt im` Monfred soine gute Stubb,
un schitt sich gemietlich, ohne Sinn,
3, 4, 18 Biercher hinner die Binn,
der hat veeleicht en Dorscht, des konnt mer sei je,
doch noch 20 Bier konnt`er net me richtisch steje,
ehm wars e bisje dummelich zumut,
doch Oaner geht noch, alla gut,
un des letzte Bier, wos soll ich eich noch soache,
des zeichte Wirkung, des hot noigeschloache,
de Herbert hot uff oamol dogehoange,
dem es sogar die Uhr schunn richwärts gonge,
un die Thek`, die hot sich veeleicht gedreht,
wie wonn mer uff de Reitschul steht,
im Kopp do war`er richtisch mer,
so wie mer uff Worfeller Kerb,
un es Licht war gonz schee grell,
dem war`s im Dunkle schunn zu hell,
do hot unsern Monfred donn gesoacht,
es werd sich jetz moal Hoam gemoacht,

des hot dem Herbert nadierlich net gefalle,
drum hot`er ogefonge dumm erum zu lalle,
denn hat soi alde Eule,
om Hinnerdaal e große Beule,
doch schließlich hot`er net long gefackelt,
un es um 4 Uhr Hoam gewackelt.


Ehr Leit war des veeleicht en Spaß,
bis`er oigeboоче war, in die Eelegass,
em Hofdoor noi, un denn schnell,
es Hoflicht oh, wos war des grell,
de Schlissel raus un mit Gefiehl,
ins Schloss enoi, e Kinnerspiel,
-- Denkste ! In dem daabe Suff,
kriegt`er die Hausdeer noachts net uff,
er hot weil`er so stockbesoffe,
es Schlisselloch oafach net getroffe.
Beim beste Wille, er hot`s net me gekennt,
drum hot er vor de Hausdeer denn gepennt,
un moijends es die Gretel veeleicht erschreckt,
leit de Herbert do, gonz ausgestreckt,
unsern Herbert war noch dippedaab,
do hot die Gretel`n veeleicht gestaabt,
Monn, hat die veeleicht e Wut,
un unsern Herbertche ging`s garnet gut,
un des Herbertche es wohl iwverall bekannt,
im Volksmund werd`er " Kupsch " genannt,
un die Musik speelt, mer werd gonz flau,
es Lied vun " Heute blau, und morgen blau ... "



Aach mit unsern Nochwuchs es wos los,
die soin im Uhfug mache groß,
die warn letzt Jahr noch de Kerb,
im Geijesatz zu uns net merb,
sie honn gestrotzt vor Tatedrong,
un weil`s zur nächste Kerb net long,
do honn`se sich gedacht,
nächst Jahr do werd mitgemacht,
denn, ehr Leit des soin koa Witze,
die " Kerweborsch vum Hessische Hof " soin Spitze,
un wos mer als Kerweborsch gonz dringend braucht,
es Kondition, denn so e Kerb die schlaucht,
drum soin die Buwe, net geloue,
korz noch Kerb ins Feld gezoue,
bepackt mit`em Rucksack un`em Zelt,
mit 3 Kaste Bier un e bisje Geld,
so honn`se om Sunnenof ehr Lager uffgeschloache,
ehr Leit wos soll ich Eich noch soache,
es End vum Lied, ehr kennt`s eich denke,
do brauch mer sich koa Fern verrenke,

nochdem die Borsch ehr Lager uffgebaut,
honn`se sich nadierlich zugesaut,
es zählte nur noch eine Fraache,
"wer von uns kann mehr vertraache ?!"

Schließlich warn die Käste Bier baal leer,
groad laafe konnt` donn Koaner mehr,
die Noacht kam aa, un zwar recht bald,
un uff amol do wurd`s ziemlich kalt,
kurzerhond wurd` sich entschlosse,
mer mache Feier, des soin koa Bosse,
nur fer Feier braucht mer jo, wos soll`s,
kloa gemoachtes trocknes Holz,
weil awwer vun der Oane Sort,
grod nix do war on ehrm Campingort,
do honn`se sich, des es koan Witz,
hergemoacht iwwer so en Jägersitz,
der stand do so schee un groad verlockend,
un aa soi Holz des war gut obgetrockend,
die 5 Jungfuchs honn donn kurzerhond,
den Hochsitz umgemoacht un donn verbrannt.



Om nächste Moijend donn, als alles wirrer klar,
honn`se geseije wos do gescheije war,
do soin`se obgeriggt un honn alles mitgenumme,
wie donn de Becker - Hennes es zum Joache kumme,
do hot verzweifelt er gesucht:
" Wo es moin Hochsitz, ei verflucht ... ",
denn do stande nur noch 4 Stumpe,
" die honn mer`n umgemoacht, die Lumpe ! "
Soi Ozeich geije uhbekannte Täter,
zog`er zurick, als`er gheert viel später,
wer`em do soi Jocht versaut,
weil er`em soin Hochsitz obgebaut,
er konnt` unserne Fuchs` nochmol verzeije,
" Do baut mer halt en Neije,
genauso schee un aa so hoch,
ehr Leit war fer die Buwe des e Plooch.
Doch wie mer sieht soin die dodroi fit,
fahrn uff`em Umzuuch mit ehrm Hochsitz mit,
der es echt, en Becker - Hennes - Spezial,
un net geklaut, sunst wär`s fatal,
un wonn ich jetz ferdisch bin, mit moin Geschmalz,
speelt die Musik " De Jäger aus Kurpalz "

Eh daß zum nächste Vers ich kumme,
werd erst emol es Gloas genumme,
eh mer moin Hals beinoh verderrt,
un moi Lewwer staawisch werd,
geb ich moi`m Mundschenk jetz en Wink,
geh mix mer moal en Trink,
donn stoß ich oh un hol` mer Kraft,
aus em Gloas voll Rääwesaft !


Letzt hot Oaner vun uns Kerweborsch,
soim Mädche, jung un forsch,
zeiche wolle wie des geht,
wonn junges Schweinefleisch entsteht.
Er hot`rer gezeigt, ehr liewe Leit,
wo de Ewwer uff die Wutze steit.
Un wie`se vor dere Box gestonne,
do guckt de Axel vorneonne,
un sieht zu soine Fraad,
wie sich do en Ewwer paart.
Aach die Yvonne war gonz verzickt,
wie der Ewwer do die Sau begliggt,
uff oamol do es`se veeleicht erschrocke,
" Was hot die Wutz donn do fer`n Brocke ?
Des sieht jo aus wie e Geschwier,
ach moin Gott des arme Dier !
Axel host`e des geseije,
des Geschwulst des duht sich jo bewije ?! "

Wie de Axel des vernumme,
hot er se in` Arm genumme,
un hot gesoat " Moim liewe Schatz,
des do unne es dem Kerl soim Spatz !! "
Do hot des Mädche err geguckt,
un die Wutz hot korz gezuckt,
denn war`s vorbei mit dere Fraad,
die zwee Sei hann sich gepaart.

Yvonne bis du moal Ärztin werst,
mußte moal zu allererst,
in nächster Zeit, irgendwonn,
lerne wie mer en Monn erkenne kann,
un du siehst mer kann sogar,
vun em Bauer noch was lerne, siehe da !
Un die Musik speelt, jetzt geb moal Ocht,
es Lied " Do werd e Sau geschloacht.... "

Es geht em Enn zu, ehr liewe Leit,
drum mach ich aa glei Schluß fer heit,
doch zuerst do muß ich alle mahne,
fer nächstjohr duh ich schlimmes ahne,
denn s`es traurich awwer wohr,
veeleicht gibt`s koan Umzuuch meh im nächste Johr,
weil mer wonn`s weiter so duht geh,
im nächste Johr allo do steh,
denn die Veroine wos en Frust,
honn fer`n Kerweumzug koa Lust.

Do gibt`s re die soache ohne eine Mione,
mer honn on Kerb gonz dringende Termine,
die Oanern die soim en haufe Leit,
nur uff Kerb do honn die all koa Zeit.



So wie`s aussieht, ich soachs frei`raus,
do fällt nächstjohr aa de Festzuuch aus,
un Worfelle, des wär doch doof,
fällt wirrer in` Dornresjeschloof,
do gibt`s die Kerb donn in de Dose,
fer alle Kappe un tote Hose,
zum Glick jedoch, ich zieh moin Hut,
gibt`s noch paar die moanes gut,
die soin schunn vun Ofong oh,
jedesmol zum Umzuuch do,
un dunn alle Leit bewaise,
daß`se on Kerb uff ehr Termine sch....

Genuch jetz vun moim Geschwätz,
moi Milz die macht schunn Sätz,
die sitzt schunn baal 5 Minute,
uff`em Trockene un duht blute,
un das moi Milz mer net verdorrt,
mach ich mich jetz moal fort,
heit owend, do gibt`s koa Gedees,
do flije die Lecher aus`em Kees,
ja beim Monfred raacht die Hitt,
kummt aa un feiert mit,
geht Oan trinke un seid froh,
wonn`s haast " DIE WORFELLER KERB ES DO "

